



Selasa, 14 Mei 2024

Ogen: Sepanya 3:1-8



Desken Serigala Si Kelehen



Jerusalem, kuta ingan pajek Rumah Pertoton ingan Dibata nehken kataNa. Metedeh kalak mulih ku je sabap i je nari me ialoken pasu-pasu e. Lit kedamen, kemalemen ate dengen kesangapen bas ingan e nari. Tapi uga jadona kune Jerusalem e lanai jadi ingan pasu-pasu? Nabi Sepanya nuriken macikna kegeluhen kalak si tading i bas Jerusalem. Oratna min kalak si tading i je patuh nandangi perentah-perentah Dibata e, tapi la kepe bage si jadi. Pendudukna pemberontak, la megiken Kata Tuhan, lanai ernalem kempakSa. Peminpin-peminpinna desken singa si erdengum, hakim-hakim desken serigala si kelehen, imam-imama ras nabi-nabi lanai ertanggung jabap ras terteki alu mperalat undang-undang Dibata guna keuntungan dirina saja. Rangap, mentingen dirina saja, dengen merawa. E kerina biak si lit i bas Jerusalem.

Amin bage gia Dibata tetap ringan i Jerusalem, la itadingkenNa kuta e aminna pe enggo seh meluatna. IlakokenNa si benar dengen si adil teptep warina nandangi kuta e. Tuhu enggo melala perbahanen Dibata man Jerusalem e alu ncidahken kekelengen e arah nasapken kerina musuh si lit, tapi teridah maka tempa labo lit oratna kerina perbahanen Dibata e man Jerusalem ndube. Enggo pe iselamatkan, biak si la mehuli e lalap idalanken.

Arah si enda teridah maka salih me Jerusalem si maba pasu-pasu e jadi si maba palu-palu. Lanai bagi arusna, dengen enggo seh meluatna erkiteken pengelako kalak si ije la nai patuh man Dibata. Enggo ngukurken dirina saja, rikut ras kepentingenna saja. Moria i persada i bas gereja guna jadi pasu-pasu man sekelewetna. Kerjasama si mehuli, alu tetap patuh i bas ndalanken kata Dibata jadi asamta guna tetap mabai dengen ncidahken man doni enda maka moria la mobah, e maka biak-biak mentingken diri saja, rangap, meganjang ukur dengen la meteh mehuli ndauh siranglah i bas persadanta, terlebih-lebih gereja sabap kita kap ingan Dibata ngerana bage pe nehken pasu-pasu man sekelewet enda.

☞ *“Tetap ndalanken sinisuraken Dibata”*



